

EKONOMSKO- SOCIJALNO VIJEĆE ZA TERITORIJU FEDERACIJE BOSNE I HERCEGOVINE

Broj: 03-30/14-892/22
Sarajevo, 21.06.2022. godine

ZAPISNIK

Sa nastavka 10.(130.) sjednice i redovne 11.(131.) sjednice Ekonomsko-socijalnog vijeća za teritoriju Federacije Bosne i Hercegovine, održane 21.06.2022.godine u 13:00 sati.

Sjednicom predsjedava gđin. Edhem Biber, predsjednik Ekonomsko-socijalnog vijeća. Prisutni predstavnici Vlade: gđin. Fadil Novalić, gđa. Jelka Milićević, gđin. Vesko Drljača, gđin. Amir Zukić.

Prisutni predstavnici Poslodavaca: gđin. Adnan Smailbegović, gđin. Mladen Pandurević, gđin. Edin Ibrahimpašić, gđin. Senad Džambić, gđin. Zoran Gazibarić, gđin. Josip Kraljević.

Prisutni predstavnici Sindikata: gđin. Mevludin Bektić, gđa. Lejla Čatić, gđin. Samir Kurtović, gđin. Bajro Melez, gđin. Zijad Latifović, gđin. Mirza Hadžiabdić, gđin. Dubravko Pervan.

Sjednici nisu prisustvovali: gđin. Nermin Džindić, gđin. Denis Lasić, gđin. Šemsudin Dedić, gđin. Sinan Husić.

Predsjednik ESV-a, gđin. Edhem Biber konstatirao je kvorum i predložio usvajanje dnevnog reda utvrđenog na Kolegiju ESV-a dana, 09.06.2022.godine.

Nastavak 10.(130.) sjednice ESV-a:

6. Socio-ekonomski status radnika u Federaciji BiH i potreba usklađivanja plaće sa troškovima života.

Gđin. Mevludin Bektić je ispred predstavnika Sindikata naveo da su 20.05.2022.godine poslali prijedlog za izmjenu i dopunu Uredbe o metodologiji i usklađivanju najniže plaće i traži da se time dopuni ova tačka dnevnog reda.

Predstavnici Poslodavaca podsjetili su da je jedan od zaključaka predhodne sjednice ESV-a bio da se napravi dogovor sa predstavnicima Sindikata, što su i uradili. O naknadno dostavljenom materijalu (Uredba) nisu bilateralno dogovarali, niti je ona vezana s onim što je dogovoreno. Naveli su da je predstavnik Sindikata na Kolegiju ESV-a prihvatio dnevni red, nakon čega do dogovorenog roka nije bilo zahtjeva za dopunom istog. Naknadno poslani prijedlog nije dogovoren i uvršten na današnji dnevni red da bi se mogao razmatrati. Predlažu da tačka bude stavljena na dnevni red za sljedeću sjednicu ESV-a i da se materijal blagovremeno pošalje.

Gđin. Mevludin Bektić smatra da ne može biti rasprave ni o čemu dok se izmjene i dopune Uredbe ne usvoje. Stava je da premijer Vlade Federacije BiH nema volju ni želju da intervenira i da je Vlada Federacije BiH nesposobna da osjeti potrebe privrede i radnika. Zato insistira da se Vlada Federacije BiH očituje da li povećava cijenu rada jer trenutnim rješenjima potiče izrabljivanje i odlazak radne snage

Gdin. Samir Kurtović je iznio su da su na dva sastanka sa Poslodavcima usuglasili pet zaključaka, od kojih je jedan vezan za vanredno usklađivanje plaća. Vlada Federacije BiH na predočene zaključke nije dala nikakvu povratnu informaciju. Zato sad od Vlade Federacije BiH traže potvrdu da će se Uredba razmatrati na sljedećoj sjednici Vlade Federacije BiH i da će se početi s njenom primjenom.

Gdin. Zijad Latifić je mišljenja da bi Vlada Federacije BiH mogla subvencionirati Poslodavce oko najnižih plaća tako što se npr. na 100 KM ne bi plaćali porezi i doprinosi. Mnogi poslovni subjekti prilikom isplate plaća godinama ne plaćaju ove obaveze, pa ne vidi razlog zašto ovaj prijedlog ne bi bio ostvariv. Pošto govori o statusu uposlenika koji imaju plaću od 543 KM, smatra da je potrebno u dobroj vjeri naći modus da se pomogne ovim radnicima bar na izvjestan period, jer su ljudi gladni. Zakoni i njihovo usvajanje trebaju proći kroz Parlament, u kojem se često lični interesi parlamentaraca stavljaju ispred interesa zajednice, pa treba na vrijeme reagirati i naći izlaz iz ovih teškoća. Predlaže da se po dva člana socijalnih partnera sastanu, dogovore i konkretne prijedloge iznesu na ESV-e.

Gdin. Bajro Melez je podsjetio prisutne da zahtjev za povećanje minimalne plaće na 70% prosječne plaće u FBiH datira još od 2017. godine. Svjestan je da pojedine firme ne mogu odgovoriti na ovaj zahtjev, ali im zato treba pomoći, a ne da se zbog njih sve zaustavi i da svi radnici trpe posljedice. Neshvatljiv mu je nespornost oko današnjeg dnevnog reda, navodeći da ga o dogovoru dnevnog reda sa Kolegija ESV-a njegov Predsjednik nije obavijestio. Predlaže da se ova rasprava odgodi za sljedeću sjednicu ESV-a i da se dnevni red utvrdi odmah danas.

Gdin. Mevludin Bektić je odgovorio da delegaciju Sindikata nikada nije uskratio za informaciju ili davanje prijedloga. Smatra da za socijalne partnere postoje dvostruke mjere po kojima prijedlozi Poslodavaca i Vlade uvijek budu prihvaćeni ali ne i prijedlozi Sindikata. Slaže se sa svim prije dogovorenim sa Poslodavcima, ali izmjenu i dopunu Uredbe koja se odnosi na povećanje plaće, a koje nije prihvaćeno, treba razmatrati na ESV-u.

Predsjednik ESV-a pozvao se na Sporazum o osnivanju ESV-a i Poslovnik o radu ESV-a, odnosno način utvrđivanja dnevnog reda i zamolio gdn-a Mevludina Bektića da to objasni i svojoj delegaciji. Sve dok ne dođe do eventualne izmjene ovih dokumenata, ESV-e će ih se pridržavati, kao i do sada.

Ispred delegacije Vlade, Premijer je ponovio da je koncept Vlade Federacije BiH jasan, tj. prihvatiće sve što se Poslodavci i Sindikat dogovore, ali nakon smanjenja obaveza poslovanja jer ne žele da povećanje plaća ide na teret privrede. Ukoliko se ove obaveze ne smanje a plaće povećaju, radnici će odlaziti, priliv budžeta smanjiti i cjelokupna privreda i poslovanje će se suočiti sa problemima.

Predstavnicima Poslodavaca smatraju da treba napraviti proračune i projekcije koje bi pokazale gdje i kako bi se povećanje plaća reflektiralo u cjelokupnom sistemu. Slažu se da se u narednih desetak dana sastanu i razmatraju ovo pitanje. Također smatraju da se zakoni vezani za smanjenje poreza i doprinosa i povećanje plaća trebaju razmatrati zajedno, te je zato veoma važno sagledati kako da to bude prihvaćeno na Parlamentu Federacije BiH. Naglasili su da je povećanje plaća i u njihovom interesu, jer žele da imaju zadovoljne radnike, da ih zadrže, jer radnici zarađuju i za poslodavce.

Na kraju diskutiranja Predsjednik ESV-a je rekao da socijalni partneri nisu uspjeli usuglasiti nijedan zaključak, pa predlaže da se predstavnici Poslodavaca i Sindikata ponovo dogovore i da o konkretnom prijedlogu obavijeste ESV-e najkasnije do 29-30. 06. 2022. godine kako bi se ova tačka uvrstila u dnevni red.

Gdin. Mevludin Bektić je tražio da ostane zabilježeno u zapisnik - Sindikati su jasno iznijeli da ukoliko danas nema nikakvih dogovora ili naznaka o konkretnim stvarima

vezanim za izmjenu i dopunu Uredbu o metodologiji i usklađivanju najniže plaće, da nemaju daljnji mandat o bilo kakvom drugom setu zakona.

DNEVNI RED Redovne 11.(131.) sjednica ESV-a

1. Zakon o najmanjem primanju u Federaciji BiH;
2. Razno.

Predsjednik ESV-a otvorio je sjednicu i dao na usvajanje utvrđeni Dnevni red. Delegati Sindikata zatražili su pauzu od pet minuta radi konsultiranja.

Nakon konsultacija gđin. Samir Kurtović je obavijestio socijalne partnere da traže da se tačka skine s dnevnog reda, s obzirom da je na prošloj sjednici bio Zakon o minimalnoj plaći i da je na upravo završenoj sjednici dogovoreno da sa Poslodavcima pripreme izmjenu Uredbe o metodologiji i usklađivanju najniže plaće za sjednicu Vlade Federacije BiH. Predlažu da se pod razno riješi pitanje za Proširenje primjene granskih kolektivnih ugovora za četiri industrijska Sindikata koji su završili postupak.

Poslodavci su prihvatili prijedlog, kao i resorni ministar, dok su delegati Vlade ostali suzdržani.

Uvodne napomene dao je resorni ministar gđin. Vesko Drljača, nakon čega je ESV-e razmatralo Prijedlog odluka o proširenju primjene granskih kolektivnih ugovora na sve poslodavce na teritoriji Federacije Bosne i Hercegovine i donijelo slijedeći **zaključak**:

Ekonomsko-socijalno vijeće je podržalo Prijedlog odluka o proširenju primjene granskih kolektivnih ugovora na sve poslodavce na teritoriji Federacije Bosne i Hercegovine, u oblasti cestovnog prometa, za djelatnost trgovine, za djelatnost građevinarstva, te za djelatnost drvne i papirne industrije. Također, prihvata se inicijativa Sindikata metalaca Federacije BiH za proširenje primjene kolektivnog ugovora za djelatnost proizvodnje i prerade metala na sve poslodavce na teritoriji Federacije Bosne i Hercegovine.

Sjednica ESV-a završena je u 15:30 sati. Vrijeme i dnevni red slijedeće sjednice ESV-a biće određen na Kolegiju ESV-a.

Predsjednik Ekonomsko-socijalnog vijeća
Edhem Biber

Zapisnik pripremila:
Snježana Kapić, MBA & mr.sci